

嘉慶直隸太倉州志

直隸太倉州志卷四十九

人物

釋道

太倉州

晉

支遁字道林晉天竺沙門嘗從金陵至姑蘇訪瞿硎先生於梅里清夜露坐見東南一舍外有氣五色詰旦於南沙盡界斷地得石函函啟二龜化鳳翔逝遁因居其地成帝咸和六年賜額名法輪寺

張采志案無錫有梅里秦伯所都事最著

今州地直塘北有梅里黃去雙鳳一舍常熟東晉名而沙雙鳳未屬州前正其盡界因是知瞿硎顯刻非出謬記

元

王惟一栝蒼人自號景陽子父官華亭因家焉棄家從方外遇至人授還丹有得乃著道書晚年寓樊涇嶽祠泰定三年書遺事及偈畢端坐逝

丐者延祐初椎跣披皂衣操大瓢往來水軍寨及張涇馬頭酒家乞飲醉輒呼牛來又于水軍寨木及人家門壁通書火字人皆惡嘗或扶之後不知所往是冬海賊牛大眼自劉河至太倉肆剽掠水軍寨及張涇馬頭俱火災始知丐者非常人

楊士在湖川塘遇人授以道術能投蓮實于冬池頃刻生花葉常啜茶肆中滴椀水成錢以酬直剪紙爲鶴卽

能飛舞又能於青天條起雲霧元賜號清寧抱一凝妙真人住雙鳳普福宮

明

席應真字心齋常熟人少辭家事老氏學精經籙及丹法兼涉儒籍奉母甚至葬祭哭如初喪人或問之曰豈有不孝神仙始提點雙鳳普福宮遷郡之白鶴觀及相城靈應宮洪武中卒應真旁通兵家言僧道衍從執子弟禮盡得其傳

周元真普福宮道士道行修潔元莫月鼎五雷之法斬勘之書得之徐無極王侍宸後授王繼華繼華授張善淵善淵授步宗浩宗浩授元真皆能致雷雨而元真尤

爲奇持

善定海寧寺僧日與學徒講說四書反復有新得人稱
定四書清奇海寧寺僧永樂六年與修大典十七年復
召至京師校讐三藏未畢而逝

惟寅喜談忠孝面折人過永樂六年與修大典住持洞
庭西湖諸寺尋至京校讐三藏賜法服數珠還居淮雲
寺以終

水噴雀不知姓名何許人游寓雷應堂冬月常浴水人
戲呼水噴雀僧卽應因以名一日忽自言當明日午時
去至期人聚觀作偈云水噴雀水噴雀四十五年無歸
着今朝鼓翅向天飛萬丈繚竿繚不着遂逝

月潭楊家子出家五臺山受具足戒遊蜀邛笈山中最
久隆慶五年來州王世貞兄弟築室居之萬歷十四年
示寂世貞稱其不備三衣不強中食初得疾水飲五日
絕水二日浴畢使人誦無量壽佛經聽已坐化

道源號石林許氏子居吳北禪寺天台智泐歿後現女
人身來往吳中降乩爲其寫象嘗註李義山詩三卷王
士正論詩云獼猴曾驚博奧殫一篇錦瑟解人難千年
毛鄭功臣在猶有彌天釋道安又有石林寄巢詩六卷
常熟陸貽典刻之

桑宗道號雲野道人好道術農家有怪乞宗道符篆揭
之窺門外有黑虎蹲踞怪遂息嘗自言曰吾葬以千鶴

爲期及葬來鶴千餘見者驚異

法樹不詳何人以鐵杖隨身雲遊者六十六年或云

鼎革後隱於僧銷兵鑄杖故相傳爲鐵杖和尚晚年別
禪院力田種樹以終

僧典字嵩籍桂林人本姓朱 鼎革後遊江浙間至正

覺菴從靈隱具德受戒爲僧謁靈巖繼起傳授心印邑
紳士請主萬壽寺旋移錫小祇園後主禪燈法席閉戶
焚修年八十一卒

國朝

本黃字璧巖常熟人娶妻四年不同寢遭明季亂出家
天童山所著詳藝文類

楊嘉斌字猶龍豫章貢生屢試不偶縱遊名山遇異人
楊規源授元門之學尤神火龍祈禱法知州白登明延
禱零壇不日降霖江浙間甚神其術晚年卜居城南年
八十三卒子次壁受其傳

通雲號石奇徐氏子少孤出家南廣寺徧參諸方得法
於天童圓悟始說法于靈鷲景星後主雪竇席隨機接
引者十有七年復歸南廣康熙二年刻期示寂

水月師不辨何時生相傳有識者云乃祖識師時年卽
上壽約畧計之幾百五十餘矣隨遇卽留留亦不久不
言禍福言則多奇中貌質朴無徒衆意所之卽担荷去
孫可成字浩軒州人明嘉靖十六年舉人耀裔孫少不

茹葦養性吐納居州城隍廟得龍虎山周金榜靈符能
除妖魅在帆山顧氏結茅蓬留數年雍正間爲沙溪延
真道院住持院傾圯可成重建三清諸大殿逆知死期
乾隆八年三月望日果逝

嘉定縣

梁

恒智天監四年住沙浦其地蘆葦叢雜有虎踞之智跌
坐經旬村叟饋食見二虎馴狎左右里人龔延鐸創菴
居之保安寺始於此尋建四十八楹中大悲閣甚閎壯
南址香花橋西址寺浜明時倭寇內訌焚毀無遺僧廣
潮重建

宋

歐法師居崇真道院紹興中有雲遊道者與歐居數日別去期三日後再來可戒酒殺待我如期果至飲甚歡就歐掌中教爲符訣自此醮祀伏壇屢著神應後立化葉子琬字懷英創建集仙宮居之嘉定間爲兩街都道正清修懋著賜紫衣號冲妙大師

莫起炎字月鼎茗溪人生寶慶間精五雷法酒醉輒伴狂詈詈呼役雷霆至元中宋濂爲碑文楊維禎爲立傳久居嘉定正統間猶在後莫知所終

居簡字敬叟潼川王氏子嘉熙中勅住淨慈光孝寺晚遊錫南翔寺工詩及古文不摭拾宗門語錄而格意清

拔無蔬筍氣著北磻集十卷張誠子序稱讀其文與宗
密未知伯仲誦其詩合參寥覺範爲一人不能當也
如茂號伯巖住南翔寺戒行高潔德祐中示寂前三日
貽書邑令朱象祖與訣如期坐逝

元

悅可號中庭居西隱寺精修淨業元統間賜號慈光高
照佛日廣慧大師後坐逝茶毘時齒舌不壞

慧可住南翔寺至正間貧民逋賦受杖慧可捐銀一萬
六千餘兩代輸

柏子庭能詩浪迹雲遊乞食嘉定村落語雜諧詞一日
偶隔某官驛從縛至知爲子庭命賦所張蓋應聲曰百

骨攢來一線收葫蘆金頂蓋諸侯一朝撐出馬前去真個有天無日頭某官笑而釋之

普明號雪憲住菩提寺與柏子庭齊名善寫蘭精針炙慧徹字士明居護國寺洪武初嗣法于僧錄善世通儒書著有蕉菴集

大彰永樂閒預修心經金剛楞伽註解

懷瑾永樂閒任副都綱同時覺臚號曰菴並預修釋典卒于保寧寺

恩鉞字古田工詩文著友雲集

道存號性中居昆福寺預纂三藏法教賜紫衣

明

道清字玉礪住持留光寺天順間任僧錄司左善世宏治間賜號宏慈廣惠禪師歿遣禮部尙書徐瓊諭祭徒戒緡任右講經歿亦賜祭緡之徒定體號東白以爲經第一擢左善世賜衣帽兩世並掌僧印

胡浩然居集仙宮成化間爲道錄左正一進中虛靜默顯教真人賜銀印玉帶

廣潮號雲峯淮安人萬厯間行脚至楊行保安寺慨其傾圯燃指以募檀施雲集寺遂更新又於城內建掩骼菴知縣謝三賓有文勒石能詩藏練音集

性通號三際蜀之宕渠人幼孤瞽目以耳受經至邑真際菴止靜王錫爵與結方外交

朱癡不知名居高橋鎮負擔爲生一日爲勢家所虐顛
發成狂久之得秘授常卧大雪中無少沾濕每浣衣濯
足天必雨或數日不飲勺水已復噉啖如初好事者爲
結茆于鎮東界溪之側王錫爵歸休病中恍見蓬首跣
足若丐者狀稱爲朱仙已詢知高橋里有異人圖其形
與所見同因偕子衡訪之與之言多隱語于是訪者頗
多朱癡自此頗厭見人每掩龕憩息或旬日不出數年
人習爲常一日啟龕視之已僵卧矣歲餘有人過平湖
見之追躡已失所在時萬歷三十六年也

大見字無等由屠戶爲僧居西林菴敝衣古貌不乞布
施而能說經黃淳耀結方外交

大蔭龔用圓季子用圓兄弟殉節後隱于僧操行清苦
通內外典先是黃淳耀兄弟殉節西林後大蔭祝髮于
此故張雪章贈以詩有千秋碧血今何在老宿依然識
此心句

國朝

超聖號野叟戒行精嚴真參實證受瓶拂于玉林邑西
門外創建普濟禪院康熙十一年大旱刲胸前肉禱于
神廟應時雨澍僧臘五十六謂其徒文峯蘊虛曰吾將
去矣絕粒十餘日自起盥洗禮佛遂入龕跏趺而逝

崇道字本如吳崧金氏子居楊行西林禪院持戒律工

詩書

本源字兀菴金壇人住真如寺遷甘露菴工詩世傳其佳句如雲蓋三椽屋池分半畝居茶香夢醒花間蝶飯熟雪留竹裏人有翠微閣集

超洪字解三姓高生前一夕母夢星墜于庭兒時喜爲此邱裝成童祝髮于白鶴寺朝五臺山閱藏經閉關十載

吳慈字貞九嘉定人築樓居妙高峯得辟穀法已遊終南樓觀所居爲僧所占不與校歸別構屋于吳縣木瀆名小桃源兼修隱形鍊虛之道康熙三十九年先期築石穴至期捏訣坐化

慧巖號躍凡周氏子雍正十年潮災父母歿時年八歲

出家積慶菴旣長遊浙江靈隱寺受戒住常州天寧寺
鎮江金山江天寺旣歸沙浦至泗塘埋素茵數百具集
福菴廢往而更新之兩菴俱置田爲修葺之用年六十
五忽沐浴更衣端坐作偈而逝

半修字見性通內外典兼工翰墨由杓山指松菴來主
真如寺尋歸杓山以老

張德熙居三教堂字雲潭小字鑑邑中稱鑑道士性誠
樸閉關修養禱雨祛妖屢著靈驗

丁傳畢生袒裼裸裎冬月坐冰穴中或與之衣不服詰
之則曰爾生時曾有衣服帶來否執一磚裹之以布終
不釋

萬慈居秦公廟守戒行喜儒書嘗與檀越談詩奕棋以爲樂

上晏字雪松居真如寺工書善詩士多與之倡和後寄居上海鐸菴預刻死日宴坐而寂

錢天民字復陽張德熙之徒清修養性年八十餘卒孫張真令字令威獲秘傳驅邪禱雨悉有符驗

崇明縣

元

紹時號省翁幼捨身慈濟寺戒律精嚴比長爲住持重建梵剎年七十餘造紙衣一襲沐浴更衣走入龕趺坐而逝

殷震亨

鎮洋志作殷震

號元振爲寶慶觀道士好吟咏有在山

稿感應篇集註簡驗醫方行世大德間遷居崑山岳祠
趺坐出火自化

明

僧琦字元璞吳縣人有學行幼度爲僧洪武十五年召
對稱旨授以印章爲僧會司俾掌崇明僧教

契穎字鈍初四明人洪武末至崇明住興教寺喜吟咏
尤精于琴永樂初徵入朝鼓數操深被嘉賞

覺曇嘉定人祝髮于慈濟寺平生未常妄語偶言未來
事奇驗時卧榻中有見其行於市者成化十七年五月
五日趺坐而化

破腹道人萬歷中人中有一隙可見腸腑嘗云仙景沙洪乃崇明中心界死當葬我於此時崇沙五六俱隔洪濤後漸成一脈今其地果居中界前言始驗

陳朝相縣役也素好善與人無競嘗遞公牒至浙偶憩祝英臺墓有一道人揖與坐適見蜚螳出出土道人指示相曰斯何物尙能於濊濁中羽化而去可以人而不如物乎相爲心動時日將暮遂揖而別及歸遂有出世之想後十年里有乩仙奇驗相往視之判曰十年不遇陳朝相今日相逢兩鬢霜相訝之又判云可憶祝英墳上坐與君攜手話蜚螳始憶其事再拜請示仙判曰余呂純陽也相因棄家訪道不知所終

國朝

廣法不知何處人乞食過崇明適當秋旱法命結壇跏趺坐默爲咒誦雨大至人結菴居之法謂衆曰此寺必當敗而復興年九十有八忽集衆作偈曰定數定數荆棘滿路讀遍周易再登蓮座趺坐而化後廟果傾頽至雍正九年有月澄者出貲新之顏曰法霖去作偈時六十五年周易之說始驗

果修字松田系出施氏幼好釋典祝髮空門禪誦之暇喜書法嘗遊浙東窮歷天台雁宕諸勝寓吳門與編修沈慰祖論書有契因住天平山之咒鉢菴

四威本金姓子祝髮於盤龍鎮之文昌宮潛心梵典四

十餘年未嘗有怠乾隆四十一年口誦偈語趺跏而逝
施亮生居吳門爲岑隆住持道行純粹屢著靈異嘗攝
妖魅至壇曰爾七世童身壞我千年苦行募修元妙觀
布金山積令神守護莫敢窺伺歿後航海者嘗見岑隆
方丈神燈

實徹字大曉警慧有學行卓錫常州天寧寺乾隆辛未
南巡臨幸

問如何是你本來面目對曰但見 皇風成一片不知
何處是封疆

上喜賜賚有加丁丑

南巡

問萬法歸一一歸何處對曰在第二次

南巡裏

上云第二次南巡何開萬法歸一一在何處義徹頓首

曰莫瞞臣僧上大笑

賜紫衣一襲後微疾趺坐說偈而逝

直隸太倉州志卷四十九終

直隸太倉州志卷五十

人物

流寓

太倉州

元

鄭元祐字明德遂昌人系出開封兒時損右臂以左手作書自稱尙左生於書無不讀爲文滂沛豪宕咸淳諸老宿皆折節下之元初隨父徙錢塘父卒移居蘇州從游者甚衆省臺交章薦潛德以臂疾辭常謂學者曰經則經也史則緯也義理淵源也學者鮮能盡得古人之義况敢私有所論述乎識者避之至正十七年薦本路

儒學教授欣然就曰講學吾志也後又陞浙江儒學提舉歲餘卒祀鄉賢祠

杭仁字仁甫上虞人從海漕徙居太倉好行義凡利濟人無吝其子禮以孝稱女妙壽守節一門著行至元六年卒年八十五有司表門復其家

熊夢祥字自得江西人通羣書旁曉音律能作數體書寫山水尤清古以秀才舉教官輒棄去放意詩酒游淮浙間卜居太倉自號松雲道人與顧仲瑛爲忘年交今艸堂雅集傳其詩

俞詮字士平江西豐城人後居太倉學識該博工詩文至正間爲浙江儒學提舉

楊謚字履祥福建浦城人徙居太倉博學有才行與秦
王袁華爲友晚作崑山州志楊維禎爲之序

文質字學古浙江温州人徙居太倉有學行辭章竒放

嘗與楊維禎夜行詠梅花燈詩立就爲名士所稱年九

十六

附詩五出玲瓏四面分一枝桃月照黃昏歸來踏遍橫斜影吹落東風不見痕

明

盧昭字伯融福建人徙居太倉淹貫經史工詩文爲縉
紳推重洪武初起揚州教授

孔宏幹字克勤孔子六十一世孫後唐時四十二世孫
名檜由闕里徙温州至五十一世孫名屋宋紹興間以
武功大夫統制江陰軍十傳至宏幹天順中聚於太倉

遂家焉幹醇謹誠樸太倉有孔氏始此

王舜國號桂宮江寧人萬歷四十二年寓居城隍廟畫人物極踈古性慙率嗜酒當興會則連幅應之否則重購不得爲周百戶畫龍張壁間一日大雨雷電繞屋雨定惟見烟楮龍已脫去友馳告舜國徐曰我畫自皆上天何足異後卒於州

胡祖虞字叔羽歙縣人崇禎七年武進士授雲南新平守備歷任永騰蠻哈副將值尙苗跳梁祖虞冒瘴穿箐直薄其巢甲申後廣西巡撫瞿式耜招共守禦順治七年冬大兵徇粵式耜殉難祖虞變姓名遁跡盤古

山明年粵苗亂祖虞挺身出手格殺數百人中伏弩死

蔣若萊字龍江長洲人善騎射膂力絕以事亡命居
劉河十餘年流賊起巡撫張國維募致軍中以把總用
守浦口崇禎八年賊至蟻附登城若萊往來奔截刃斃
及墜城死者無筭國維上其功累擢參將明年賊從間
道犯江浦若萊赤手搏賊奪其刀以戰復大破之拜都
督守安慶又破賊於潛山後守金華孤城援絕先焚其
妻子巷戰經日力盡自刎死

吳允侯字茂長休寧人性任俠負經濟才嘗傾千金結
客崇禎末上書督師史可法賓之禮賢館假職監紀軍
務渡江督餉行五日揚州破允侯欲馳回不得鵬冠芒
屨旅食吳中爲文祭督師擬於西臺慟哭

邵光龍字爾躍休寧人甲申兵燹家貲蕩析光龍奔走衣食躬翼弟姪遇故人貧困傾囊濟之子學易繼父志口約腹裁率以濟人中年累金數百爲所親貸不能償請以屋質學易惻然焚其券

國朝

杜登春字九高世籍青浦爲給事中張王治壻遂家太倉順治八年選拔貢生旋以奏銷案畢說康熙十四年入貲得授翰林孔目以善書繕

太宗實錄

上稱之議叙知廣昌縣興學校集流散除地方礦害却捕鷹使者豁寃丁千餘人在任十二年有能聲旣歸與

黃與堅唐孫華王吉武流連詩酒者十年再補浙江處
州同知旋署宣平不一年卒於官年七十七著有尺五
樓文集性廉直自稱薑翁居官不名一錢又通相術語
輒奇中子昌丁字望之青浦縣監生詩文書法濡染家
學嘗入雲貴總督蔣陳錫幕陳錫謫往西藏運兵糧昌
丁與偕行渡瀾滄踰雪嶺山水險峻經萬餘里至藥龍
宗而還雍正四年中順天副榜補教習雍正七年御史
王峻薦以知縣用補福建浦城調永春會永春改直隸
州卽擢知州事母老終養服闋補原官三署泉州府及
建寧興化府卓薦候陞永春西境地窪多水患昌丁築
壩禦衛爲永久利民德之稱杜公壩所蒞號廉靜任永

二十七年沒後遺藁蕭然孫蕃錫字用玉醇質好學以監生充實錄館校對早卒

金樟字匡秀浙江稽年十五爲諸生以廩貢授樂清訓導康熙三十九年成進士考授中書改補行人四十四年分校順天鄉試所得皆知名士繆沅秦道然吳翊其尤著者尋陞工部都水司主事居官廉慎勤敏尙書陳說語人曰安得曹屬盡如金主事吾輩盡諾而已嗣以親老乞歸不復出晚年構別墅于城西顏曰含清與四方名士唱和忘倦性澹泊鯨居十六年不畜婢妾年六十四卒弟梓一任河南淇縣三任河工同知歷著宦績檀候選光祿署正博學嗜古樟子三宏勲烈燾宏勲字

元功有文譽雍正七年以繆沅薦發四川署雙流成都縣令補安岳調巴縣丁艱服闋補涇縣卓薦陞壽州歷六安再薦擢知汀州府事所至多惠政以疾乞歸烈字楊武饒材略循例選盛京刑曹遷戶部主事以忠勇公傳恒薦擢吏部文選司郎中銓叙肅清出爲廣東惠潮道調管糧驛有清名俸滿入覲卒於京熹字佑良性和易與人交有終始少嗜學中雍正十年舉人補內閣中書轉起居注主事晉刑部員外郎注名御史旋告歸林泉以老烈子三壩歷任刑部郎中山西潞安知府卒於官垧任廣西新寧知州墜任象州知州檀孫可琛吳庠生書似文衡山畫入宋元之室寸縑尺幅爲時所寶

金氏系出新安曾祖士瑜由桐鄉遷太倉至樟已三世
爲州人至宏勳且五世而列流寓者以其籍仍桐鄉也
鄭起泖字紀淳崑山人族父伯昌得禁方精于醫戶外
屢滿輒遣起泖代往性絕敏於諸方書稍涉獵卽有神
解遂臻勝妙然非其意也嘗發篋得先人遺稿數十種
皆梓以行力不足繼以資貸避家難來太倉年六十二
卒孫耀字紫儒州廩生充戊辰歲貢有穀字商衡崑山
庠生並有文譽

蔣元益字希元長洲人乾隆十年進士由編修歷任至
兵部右侍郎年七十一致仕主養東書院遂移家居焉
八十一歲卒

黃銓字清臣福建南安人祖燁適太倉遂家焉銓十三

隨祖客永春州晨昏定省知州嘆曰有孫如此無異有子矣祖歿歸養祖母及祖母歿重赴永春載祖櫬歸葬而以父母祔之生平好善樂施卒年七有六

嘉定縣

宋

林英發平陽人贊於邑之陸氏登嘉定四年進士知建

昌縣山寇竊發有戡定功擢知壽昌太守趙與憲宋史與憲

所至急於財利少嘗師之及與憲知平江禮意甚篤英幾於聚斂之臣

發卒與憲葬之蘇州西穹窿山按程國棟志作永嘉人今從浙江通志

吳惟信字仲孚吳興人寓居白鶴江以詩名郡人縻先生老儒也慎許可常見惟信傷春絕句云白髮傷春又

一年間將心事卜金錢梨花瘦盡東風軟商略平生到
杜鵑嘆曰真謫仙才也

元

趙孟頫字子昂吳興人父爲黃姚場大使因往來嘉定
嘗館大場沈文輝家方建義塾孟頫乘興遽於木板上
作義塾二字自謂愜意及後累書不逮竟用初筆

按縣志云

文敏爲宋孝宗嫡兄崇憲靖王伯圭四世孫曾祖師垂
祖希永父與皆任宋皆至大官文敏年十四歲卽以父
蔭爲官豈有父爲黃姚場大使往來嘉定之事况文輝
建塾在延祐二年時文敏已爲集賢侍講又安得有乘
興書版之事乎或曰文敏夫人管道昇父家
青浦之小蒸里文敏嘗往來湖上因有此書

楊維禎字廉夫會稽人徙居松江往來嘉定寓強氏一
時題咏甚多

張天永字長年其先高郵人元季奉母避地嘉定母喪後累辟不就余闕稱其文如水涵山出詩冲遠清麗比韋蘇州著有雪蓬行稿溝亭集

王逢字元吉江陰人臺府交辟不就僑居青龍江上與邑人士以吟咏相往還

吳轍字中行台州人元末遜跡泖濱懸壺陳溪之上顏其室曰野人居名人多題咏倪瓚繪圖以誌其勝後遷青浦里天仙街卒葬於此子孫世業醫

阮孝思字維則陳留人工詩文元季僑居嘉定與秦昂王彝金文徵張展輩齊名

焦白字任道淮南人張士誠辟爲湖學教授不就隱海

上以詩畫自娛明初舉遺佚白變姓名寄食嘉定林原
家或諷曰君頎而髯黃金加鞶爵列侯等不愈於帶索
耶不答卒年五十

謝應芳字子蘭武進人耿介尙節義文有根柢元末避
兵白鶴江上年逾八十歸老其鄉之橫山

余叔敬宜興人元末兵亂負母避地嘉定邑人龔孟德
爲買田築屋於錢門塘居之知州張率題其居曰清曠
軒

張觀字可觀嘉善人僑居嘉定畫山水師夏圭馬遠旣
與吳興吳鎮遊筆力益古勁精鑒古器物書畫後徙華
亭嘉興洪武間寓長洲之周莊歿

明

陳光遠不知何許人成化中僑居安亭望仙墩下醫術神異所善客于死於痘携樽將之野道遇光遠視之曰而子不死吾當活之取沙遍攤其體命衆羅擊鉦饒之屬觀者如堵以爲誕也有頃兒忽動旋活矣客問所以曰兒所苦水痘無力自達得土氣乃疏金爲水母鳴則水應而出矣御史行部而病召視長揖不拜旣診脉曰大人無疾往時病當服補中益氣湯二十劑炙臆中二十疾乃瘥皆中半而止所以復發滿之自愈御史驚以爲神改容禮之他日就訪茅舍三楹不蔽風雨欲爲繕修固辭不受崑山富人父病且死延致之方爲療治聞

鼓吹聲問之納妾語其子吾意不在金帛脫幸活君父
顧以新姬相贈子唯唯卽令出侍寢遠笑舉所佩金牌
示之有不近女色四字文且漫滅不知年所曰吾以試
于父與妾孰重子無恠情可謂孝矣卒活之所至軌著
奇效而於賄悉無所受人頗怪之後去不知所終

史寶字國信蕭山人僑居邑中通陰陽虛實之變一人
冬月鼻出血教之服胡椒湯問其說因置豆數粒斗中
急蕩之上下旋轉不失稍緩遂躍出曰此則君之病矣
人營衛調和則氣血流通君腦中受寒故血行澀澀則
不得歸經故溢出耳非熱疾也如其言而愈

歸有光字熙甫崑山人嘉靖四十四年進士仕至南京

太僕寺丞中歲嘗寓居安亭聚徒講學倡導古文海內
稱震川先生邑士多從遊者邱集張應武尤知名後之
通經學古文者如婁堅唐叔達淵源皆由於有光曾孫
莊字元恭詩文豪放善大字工畫竹邑中多親串莊流
連浹歲有富商以厚幣丐作堂記莊訶斥之去

馮淮字會東居崑山之安亭好吟咏往來吳淞江上濱
江有禪寺時獨坐古桂下吟不輟一日過上海層事陸
深時五月有朱橘垂穎深請賦詩淮口占示之深大稱
賞淮性瀟灑又好遊觀山水久之病目不出卜築盤龍
江上父子力耕其間

宋登春字應元新河人棄家遠遊嘗至江陵時徐學謨

爲荊州知府見其詩異之延爲上賓學謨罷歸嘉定登春行丐千里來訪學謨爲授廬不可自髡其髮逸去已而學謨再起爲禮部尙書登春詣京師勸以早退且曰公第歸吾終當就公蹈東海死耳學謨旣謝事登春果來居二年徑去躍入錢塘江死

張元陽海鹽人以豪傑自命好談天下事游嘉定與張名由友善

程嘉燧字孟陽休寧人僑居西城少卽工詩中歲哀所作名浪陶集唐時升序之云孟陽才力足以追配作者而哀樂所發長句短章必合於法度婁堅以爲其所師法不必同而同歸於自得善山水兼寫生尋寓于虞山

錢氏耦耕堂者數年崇禎十四年歸新安而卒年七十有九世稱松圓詩老

宋珏字比玉莆田人詩畫高雅拔俗尤以八分擅長初見程嘉燧荔支酒歌行求七載始識嘉燧于嘉定知縣陳一元座上遂以兄事之因遍交邑中知名士東城塾巾櫛槎上檀園皆其流連觴咏處

蔡長不知何許人狀貌魁梧多膂力善飲啖明末自松江來里中侯伯宣見而異之爲授館與之語有不可一世之槩終其身未嘗自言名字以形長故謂之長或曰蔡亦非其本姓

陳忠任武職結廬桃浦與蔡長陸景淳侯氏諸子相友

善 鼎革時有捍衛里黨功

陸景淳字師古上海陸深來孫經明行修所至以詩文稱侯峒曾延主師席遭世變絕意進取不言時事學者稱隨菴先生弟濟字公謙贊侯安國家文行如其兄擅繪事著畫史竹譜行世濟子天錫

殷銘字又新長洲人順治中棄諸生入都抵江右歸隱楊行里居白沙社手定唱和詩三百餘篇顏曰詩存行世

陳舒字元舒自云平湖人嘗登賢書或云金陵人勝朝遺老寓邑最久貌奇偉詩畫並脩然絕俗

俞慈成字心齋浙西人負經濟才明季以大臣薦入都

託病歸後寓邑之莊溪將死囑其子嘉客曰勿返祖墓
勿刻詩文我目瞑矣嘉客字韋示性至孝工詩古文
葉允升字石農新安人明季業賈僑居南翔工詩與閔
裴友善康熙初復至南翔年已八十餘
葉廷桂崑山人明兵部侍郎盛後披緇雲游嘗至邑寓
清涼庵行笈蕭然未幾浮海入閩不知所終

國朝

諸士儼字莊父崑山諸生順治初寓邑中課徒自給潛
心程朱之學陸隴其問學錄曰莊父之學不如陳確庵
陸桴亭而刻勵過之

馬萬字士延長洲人積學善詩尤工詞曲授徒邑中性

辟而介非義調之不受當歲稔知縣余敏餽以秉粟謝
曰吾非翳桑餓人他日無以相報不敢餐侯粟也後竟
以窮餓死其稿多散佚

吳歷字漁山常熟人明都御史訥七世孫嘗遊太倉問
學於陳瑚學槩于陳砥阮學畫于王時敏因盡出宋元
真蹟示之晝夜服習于黃王吳倪四家深入其奧故畫
爲尤工居言子墨井故里人稱墨井道人棄家浮海至
廣東入西洋窮山水之奇怪而後歸晚歲往來嘉定寓
居東城歷性情孤潔世或以爲畫師或以爲高士然讀
其無端詩云云似別有寄託者年八十四張雲章作傳
邑人陸道淮字上游歷入室弟子也集其詩爲墨井詩

鈔二卷又集題詩畫鈔一卷行于世

董德其字屺瞻原籍松江世父宏儒父宏度皆以經師教授邑中德其寓居厰頭康熙十七年由嘉定學入鄉薦需次知縣不赴選安貧味道志行卓然有兩世詩文集從弟歲貢生德華字滋邁亦有文行

錢顧琛字獻侯吳縣人才名籍甚屢游嘉定以邑籍登康熙十八年進士嘉定士及其門者多知名于時後仕黃岡令有惠政

莊雅字晏如崑山人少負奇氣後至邑中賣卜好吟咏野服黃冠時與山野畸人相唱和

諸瀚字霍臨上海諸生初攻舉子業不售遂肆力於古

淹貫經史善詩書評左史箋老子道德莊子離騷及唐
宋大家文居邑之江橋授徒槎上出其門者多以古學
知名

陸天錫字思順濟之子孝友文學爲諸生祭酒子文然
字裕可有父風兩世以詩文名名雋爭從其游曹一士
題曰二陸詞翰蓋卽用董其昌品其祖深及垞句也

巴來字葑青徽州人寓秦公廟能書詩善竹枝體卒葬
廟後

崇明縣

國朝

林喬字偉人籍福建初寓吳中從都督李

幕遂僦

居崇明詩才清妙尤工五言律與金城施鑑儀施邦彥
施何牧往來酬唱何牧叙其稿梓以行世

劉某行四不知其名籍傳聞曾仕於浙 鼎革後寓崇
明窮巷一廛僅蔽風雨而清吟妙繪時時間作但從不
署名兼善壬奇風角之術言無不驗時困乏有饋者弗
受也惟與張隆純善與輒受周之終其身卒葬張祖塋
傍今張之子孫世奉祭掃呼劉四公墓在享沙楊虎狀

生員

屠奉誥
屠逢泰校

直隸太倉州志卷五十終

直隸太倉州志卷五十一

古蹟

地里郡國諸志俱並載古蹟旣足考証經史又開
因革廢興之政不可畧也夫過墟生哀入廟生敬
與夫甲第名園金石喬木之流傳咸足據懷古之
蓄念故詳採列焉而叢祠之不在祀典創于方外
者亦附著于篇志古蹟

城倉公解

太倉州

婁城名勝志云圖經云婁城在今縣東三百步

縣指崑山言

吳子壽夢所築舊志謂之東城今橋巷猶以東城爲名

或曰漢膠縣也

張泰登棗城詩高城一望思茫茫湖轉棗江入海長邊境到今無漢縣古倉何

處積吳糧鵲棲法渚寒蘆靜雁落平疇晚稻香野水閒雲吟不盡玉峯西面看斜陽

南武城名勝志云漢志有南武城闔廬所築以望越賁
宇記云梁天監六年分置信義縣于此今崑山縣西二
十里有信義村疑卽古縣治

吳兩倉越絕書吳兩倉春申君所造西倉名曰均輸東
倉周一里八步後燒更始五年太守李君治東倉爲屬
縣屋不成

東倉名勝志云相傳春秋時吳王置倉于古婁縣之惠
安鄉或云吳王渙或云孫權陳仲事蹟云在武陵橋北
人猶呼鎮海衛西基曰倉基

宋平江節制司酒庫舊志云在州城內張采志曰今不辨何處桑悅有詩又相傳塗松亦有酒坊

滄江風月樓名勝志云宋時置節制司酒庫故有滄江風月樓在今州治北巷元之酒館也因通海運商舶貿易者咸萃止焉

吳翌詩市橋風月占無雙醉舞清歌戀綺窗我問酒壚空寂寞一生孤負住滄江

崑山州學在州治北今俗猶呼文廟基內有益清堂元知州王安貞構堂講室旁鑿池植蓮名曰益清

抽分竹木塲在城東北隅元時卽長洲縣許墅稅司分辦太倉明初因設官置塲抽分竹木柴炭等物城東北阿有門曰竹塲後塲廢門塞人猶呼其地爲竹塲門

慶元等處市舶分司在崑山州醫學後按醫學在文廟
西以舊學度之則是北隅元至正二年提舉脫脫造又
鄭端簡云洪武閒設黃渡市舶提舉司于太倉尋以近
京師罷之

稅課局在海寧寺前明初因元制令崑山置局又子局
五一在城內一石浦一安亭一兵墟一茜涇嘉靖四十
一年革今其地尙呼稅務舖橋曰稅務橋

沙頭河舶所後移建長洲縣葑門外華家橋西猶仍舊
名

義兵營在塗松塗松本古鎮宋元豐閒改爲市元末張
士誠城其地立營防海寇城後廢盛彥詩曰蒺藜幾處

荒城秋謂此

安樂堂在海寧寺前憇養病卒之所

〔鎮洋縣〕

楊林寨在茜涇係鄉兵山水寨宋紹興四年置有閫武亭後移設于今新塘北鎮名猶襲茜涇明初設巡簡司今廢

劉家港水寨元至正十三年立設水軍分鎮萬戶府又于南北岸各立萬戶府共三署明初罷署廢正統初金山警巡撫周忱都指揮翁紹宗復議設軍寨至成化十八年築堡

劉河堡在劉家港口明成化十八年都指揮築郭鉉築

周圍三里高二丈二尺濶三丈三尺城門東西南三水
關東西二城上有望海樓濠廣五丈二尺深五周堡外
護潮圍塘高一丈二尺廣四尺國朝以來潮水衝齧
堡東南漸坍入海今堡內無居人

元崑山州署在陳門塘延祐初建至正十六年復建治
馬鞍山之陽署廢

捕盜司卽縣尉司縣升州更名在廢州治正廳西後移
花園堂支分兵馬司崑山志云在太倉花園堂之右舊
爲蒙古學今廢惠民藥局在鎮民橋南今廢

書堂元監州那懷建延師訓市民子弟在花園堂西偏

今廢

明太倉衛署卽元崑山州治基吳元年建明末圯今其地猶呼衛基

巡簡司一在茜涇鎮卽宋楊林寨吳元年改一在劉家港明洪武七年設今俱廢

經歷司千戶所洪武四年設卽花園堂址

茜涇稅課局子局之一也詳見太倉州

海運總兵公館在城東半涇上洪武七年靖海侯吳正建久廢甲仗庫在朝陽門外洪武七年靖海侯吳正建貯海運鎧仗器物久廢

寧海驛在西城外三里洪武十七年設宣德六年移置崑山後卽舊址構屋爲館至今俗稱館驛前

太倉衛軍儲倉在長春橋南洪武二十年指揮高曉建
正德年廢嘉靖二十六年兵備道敖璠復建尋廢

鎮海衛軍儲倉亦在長春橋南舊爲武寧菴洪武三十
年改建後廢萬歷三十五年兵備道曹時聘復卽基址
移府館西書院改建名爲常裕倉俗呼新倉今廢

海運倉在大南門外婁江北岸洪武二十六年建有天
地等殿九百一十九間永樂十三年平江伯陳瑄奏罷
廢爲教場

東亭子在城東平涇上涇濶三里許靖海侯吳正構亭
其上人呼亭子頭鄉民就市羣集亭下今亭廢涇淤不
及三丈有水橋猶呼亭子橋

兩淮都轉運鹽使司分司署在長春橋西永樂十年分司官袁永成建今廢

婁江南館在大南門外三里馬頭上門堂寢室俱備門前亭曰南征傳舍今廢

婁江西館卽寧海驛故址正統八年改館嘉靖間重建門堂寢廡俱備門前亭曰西關駐節國朝以來圯廢止存碑亭俗呼接官亭

府館俗呼公館在鎮民橋西長春里宏治九年蘇州府同知李復貞割文昌道院基建爲查盤理刑公署今理刑裁館亦廢

兵備道署在海門橋西正德七年設兵備道于太倉九

年都御史王真奏罷之署更爲都御史行臺嘉靖十四年給事中朱隆禧請仍置兵備道轄蘇松常鎮四府駐太倉州復舊署萬歷二十二年分水利道轄常鎮二府太倉兵備道專轄蘇松二府 國朝康熙二年移置蘇城署遂廢今基地建縣治

書院在府館西長春橋北舊爲二卿祠嘉靖十五年判官徐汝圭別建祠于城之西隅因其堂室改爲書院今廢

舊察院基在儒學西今婁東書院卽其故址

詳學
校志

泰將府在劉河堡南門內嘉靖四十五年建萬歷初改爲遊擊 國朝康熙六年移駐茜涇鎮府遂廢

千戶所亦在劉河堡內嘉靖四十五年建等廢

將臺在劉河鎮南里許相傳宋建炎四年韓世忠駐軍海口時築今土人掘地得瓶有兩耳者目爲當時賞軍酒瓶又演武廳將臺一在大南門外大教場一在劉河堡教場今俱廢

嘉定縣

槎浦在南翔鎮南名勝志云槎浦在縣南三十里有上槎中槎下槎舊傳張騫乘槎至此其地張姓特多

嚠城在縣南三十里周二頃中有殿址俗呼爲城頭名勝志云縣南門外有嚠城元時得古塚碑碣曰唐咸通三年莊府君葬于嚠城鄉卽此地也今名嚠塘又漢有

膠縣疑卽此城

新豐鄉在縣西南十八里宋咸淳七年黃渡鎮土人掘地得壙石刻曰唐新豐鄉

當山樓名勝志云縣學前有山在留光寺傍廨內有樓曰當山名本諸此又有讀書樓宋淳祐九年縣令林應炎建其次年復建水竹亭今俱廢

寶山縣

陽城在吳淞江南名勝志云舊傳吳王所築基址見存滬瀆壘名勝志云晉安帝時吳國內史袁崧築此以備孫恩遇害死之

防海壘舊傳盧潭所築

廠頭在縣東三十五里相傳爲宋韓世忠屯兵處地有八景

〔崇明縣〕

鹽課提督司署宋開禧三年改崇明鎮爲天賜場設官主收鹽課元至元十四年升場爲州因改司署爲州治州廳舊匾曰敷政知州任子明書後改曰無倦後堂有小山區曰奉公後改自公久廢

捕盜司名勝志云在州治西區曰晏然吏目廳在州廨左區曰蓮幕俱州守任子明書俱廢

蒙古字學元至正六年國師八思巴創今廢

義泉亭明知縣范性建

文成壩在東阜平安沙 國朝順治十二年知縣陳慎
築以捍張名振者今廢

金鳳山亭康熙八年總鎮張大治築山十七年提督劉
兆麒建亭于巔後爲暴風飄毀知縣朱衣點重建今廢
魁星亭在金鰲山上知縣朱衣點建

頌春亭在譙樓南

第宅

〔太倉州〕

巫咸宅郡國志云婁縣山下有巫咸宅山海經云大荒
中有靈山巫咸從此升降今海中有蛇山一名長山西
北風一日可至上有民居基址相傳有遇仙于此者豈

所謂海隅者在是巫城古神巫或以荒遠爲憑依歟今按越絕書曰虞山商臣巫咸所居則似屬常熟爲可據聊從舊志存之

芝秀軒元馬廷玉居是虞集書楊維禎詞李孝光記時稱三絕

南野齋居明陳符宅在沙溪

鹿城隱居盧熊宅易恒有詩

印溪書舍符子蒙所居沈周有詩

綠筠軒顧睿建在雙鳳里林復有記

懷遠亭徵士周賢建在雙鳳里又有守元亭

通判桑悅居址在穿山南一里許

北山小隱廣南府周墨居在雙鳳里

松巢參政周在宅在雙鳳里又有見榜亭

繁春圃少參郝鼎居在雙鳳里

萬卷樓尚書王世貞宅旁藏書處在鼓樓鋪

北野堂龔起鳳建在三塔灣

鶴來堂太傅王錫爵第以萬歷己亥立春日有素鶴來

集故名又有三餘館在其旁

天官第沈昌期居在西門內

七錄齋庶吉士張溥所居

織簾居貢士顧夢麟築在雙鳳里

抱灌軒 國朝吏部唐孫華居在雙鳳里

澄觀堂卽明王錫爵舊第 國朝康熙間其曾孫煥拜

大學士十一年 御書賜額

穀貽堂在相第西戶部侍郎王原祁所居康熙三十九

年 御書賜額

遺安堂順天府尹錢晉錫第康熙四十二年 御書

賜額

鎮洋縣

朱都官員外龔宗元宅在黃姑村

按陸游劉過並有龔昱栢間堂詩

朱清宅在武陵橋北清盛時子顯祖塞鹽鐵塘經市者

建宅築衢萬戶李八撤兒爲建鼓樓朱敗樓毀今其處

有橋猶呼鼓樓橋

雪履齋元郭翼居楊維禎爲作辭并序翼又有還美堂
春水船般奎讀書處在武陵橋下又有婁曲草堂
南園瞿知所居楊維禎記又有壽萱堂

來鶴亭呂誠築誠嘗畜一鶴忽有野鶴自至因構亭名
之

貞節堂陳寶生奉節母莊氏所居朱濂記又有春草堂
高啟記并詩

高節樓明郡學訓導袁華奉母陳氏所居在木魚橋左
按張采名跡志外又一條云高節樓陳德母守節處士
大夫楚之是有兩高節樓也而列女傳皆不載附議于
此

江雨軒吏目偶恒居在茜涇恒又有東墅草堂

芝蘭室張師賢所居

耕穫亭秦約築在西渚北

乾乾齋陸仁居

書聲齋姚文魚居又有野航亭人稱姚野航

獨醉亭湘陰丞史謹居

觀雲軒蒼簣軒揚州教授盧昭居

按蒼簣軒太倉舊志以爲偶桓居而藝文

又作盧昭崑山志則云馬廬居未詳孰是

新莊盛或居郭翼有詩

賜閒堂參政陸昶致仕後築在城中

春雨堂太常陸欽居

姜參政昂宅在普濟寺南俗呼姜家牌樓後張采居之

堂前一古桐云是昂手植

城南草堂陸之裘居在甘泉里

歲寒居司直張寅築在來鶴亭西北

洞庭分秀在樊村涇西俗稱江家山太倉衛指揮江某
築山下石洞中有碣載桑悅詩及毛澄龐暄劉應祥聯
句後宅歸張氏改名日涉園石碣尙存惟桑詩漫漶不
可識聯句尙完好

棕亭陸世儀居在海門橋南

寒溪清耳亭盛敬居在王氏南園北

按是時顧土璉居樊村涇之東敬及

王勣居樊村涇之西號樊村三隱

靜觀樓郁法與學正文祖堯及陸世儀陳瑚講學處在

太倉衛南陳瑚有記

舊學菴 國朝祭酒吳偉業築在梅村之西偏

榮杏庵廉州守王鑑居在弁園西偏

如松堂官贊黃與堅宅在南門內康熙三十八年

御書賜額

秋水亭許旭居在長春橋南

長春草堂朱汝礪居在長春橋東北

蘇喘軒縣令王恪構在三官閣左

虛直齋光祿卿沈起元構在城南

洗桐軒行人顧陳塋居在城隍廟後

尚德堂贈光祿大夫畢禮居在東門外小祇園衙口

嘉定縣

宋朝議孫載宅在南巷

嘉樹堂元徵士強瓊宅在城西北楊維禎作記別有文會軒在學宮旁

東里草堂明徵士王彛宅在縣治東高啟有詩又有堂曰光硯王行記

三隱堂尚書龔宏宅以其先世龔宗元有中隱堂龔況號起隱子故名在東門外蒲華塘

孝友餘慶堂副使張情宅在宮保橋西情自有記

世忠堂尚書徐學謨宅華亭董其昌爲其孫元嘏書在宮保橋西

呂聖草堂學謨築以居老友邱集者

東岡草堂處士朱樵宅在外岡鎮陳瑚有詩

壽硯堂明進士王泰際隱居處在六都今爲享堂

齊年堂 國朝庶吉士王晦宅康熙五十八年 御書

賜額在四牌坊

世勤堂徵士張雲章居在南城張錫爵有記

雙清閣官詹張鵬翀居乾隆九年 御書賜額

寶山縣無考

崇明縣

劉鏡好莊已下俱在三沙

宋張循王莊

直隸太倉州志 卷五十一 第宅

韓侂胄莊

寶成莊

富儲莊

園林

一太倉州

五柳園宋胡稷言所治子瞻顏其堂曰如村孫百能仕

歸復築宜休堂在塗菴

黃吳郡志云五柳堂在邵城隍鎮里然陸世儀有吊塗菴五柳

園如村二堂

遺址詩春風搖搖百草抽沙頭水合東西

樂隱園元瞿孝禎所築地名團溪在沙頭鎮楊維禎爲

記

南園明處士陳繼善所開園擅十勝在塗菴龔詡有詩

西墅處士劉棣別業在穿山文徵明有詩

安氏園杭州訓導安邦榮在城東北王世貞有記

案園久廢

爲僧舍然人猶呼爲安家園

王氏園在鶴來堂後太傅王錫爵所治

按宅後東西可三百尺南北三

之其陽爲菜畦畦盡修垣竇而入十餘步橫隅大池循橋得還右方爲亭城亭前累石成島于石隙引機作水戲左方池稍廣前後堂楹各具牡丹至三百餘本菊倍之又多名花果今僅存梅花橫及荒池矣

離贅園王世貞別業在鸚哥橋東第之左世貞自爲記

今錢氏享室卽其故址

按張采志云第之左門不五步而渠橋踞之臨橋而門榜曰離

贅東西不能十餘丈南北三之入門爲蟠松方竹十餘

莖最南有亭曰壺隱其三方皆梅前疊石爲山頗盛沼

蓄朱魚山亘丈許中有澗有洞有嶺有梁右方書室二

左種竹竹間亭瞻髮壺隱後得小園二榻以竹雜植桃

杏芍藥諸屬園盡得逕爲廣除列孤峯累洞庭石左右

玉螺綠萼梅各一大可蔭臺臨臺屋五楹日鸚適軒左

方以竹得名曰碧浪右室可棲客曰小憩後池曰芙蓉
沼沼後距牆咫尺而近覆垂柳度小憩室折而西北側樓
三楹其前庖湯浴室皆具焉又志云世貞所居曰薪庄
子土驥于宅後闢地曰約園世貞有記今分屬人故不
志

學山園司空任子張灝所築在居宅後俗呼張家山後
曾屬其從弟溥李繼貞有記

吳氏園吳雲翀所居後讀書處在州南稍東

玉樹園觀察凌必正所治以園多玉蘭蔭十餘畝故名
後歸崔華在直塘

靜逸園 國朝錢陞別業今爲畢氏享室

錢園中書錢廷銳別業後歸尹氏在州治東

勺園學博毛張健築今俗呼毛家園在太平舖後後歸

陸建運

依綠園本盛氏別業後歸毛成肅復割賃顧氏在北巷

鎮洋縣

花園堂元時朱清家後爲捕盜司在太倉衛舊址東
菽園明參政陸容築中有成趣菴獨笑亭容自有詩紀
之園在明德坊西

錦溪小墅參政陸景築在菽園東西隅何喬新有記
靜逸園太常陸欽築在鶴市今其地名荷花池

田氏園鎮海衛千戶田某築旋歸凌氏王世貞有記後
歸楊氏今廢地猶稱楊家山在太倉衛左

日涉園都督楊尙英築在太倉衛西南園成四載子指

揮之慶轉售他姓後歸郁禾

季氏園觀察季德甫築在南門外度津橋稍東王世貞有記

王氏麋場涇園世貞世父忬築園初成勝冠吳郡郡人尤子求爲之圖世貞有記後廢凡峯石盡徙弇山

弇山園俗呼王家山在隆福寺西尙書王世貞築廣七十餘畝中蘊三峯曰東弇中弇西弇俗呼西爲旱山東

中爲水山極亭池并木之勝爲東南第一名園世貞自

爲八記

其畧曰園之中爲山者三爲嶺者一爲佛閣者二爲樓者五爲堂者三爲書室者四爲軒者一

爲亭者十爲修廊者一爲橋之石者二木者六爲石梁者五爲洞者難若瀨者各四爲流杯者二諸岩磴澗壑不可以指計竹木卉草香藥之類不可以句數計園畝七十而贏土石得十之四水三之室廬二之竹樹一之

此吾同
之槩也

澹園太常王世懋築在城西南隅去弁園半里世貞爲
文記之世懋沒園分賃他姓其半爲香象菴 園朝康
熙間有烈尼周氏以拒暴見殺菴毀

南園太傅王錫爵種梅地在湖香菴北中有繡雪堂渾
影軒香濤閣水邊林下烟垂霧接諸勝會斥爲僧舍後
有族名圻者居之今轉賃畢氏其半屬問梅禪院

東郊園在東門外半里亦名東園王錫爵種芍藥處孫
太常卿時敏拓爲園林有藤野室揖山樓凉心閣期仙
廬掃花菴春曉臺幽綠步梅花廊剪鑑亭鏡上晴倩諸
勝 國朝嚴虞惇有記

西田亦曰歸村王時敏別墅在西城外十餘里 國朝
吳梅村有記

曹氏杜家橋園鄉進士吳學所治去城北五里曹又有
園在沙頭王蘭木樺株可數圍高出堂外

蕃園尙書王在晉別業在西郊二里許

梅村在太倉衛東爲明王士驥貢園 國朝祭酒吳偉
業拓而新之易名梅村中有樂志堂梅花菴嬌雪樓鹿
樵溪舍橙亭諸勝今僅存梅花菴

避村舊爲吳震元別墅卽菽園故址也後歸 國朝興
化守許煥中有鴻雪堂最勝堂臨大池池北疊石高十
數丈玲瓏如剔今廢

嘉定縣

龔氏園宋錄判龔天定闢一在黃姑塘一在仁里橋北
趙氏園宋儀曹趙安國闢在孩兒橋西

元浦氏園在縣城東南三里

明水邱園在北門外

市隱園隱士孫以明闢在葛隆鎮

梅谷山園徐氏闢在台浦門外

唐氏園在演武場西

滕氏園亦名萬竹居在南郭外

歸有園尚書徐學謨闢在演武巷西王世貞有記

石岡園布政龔錫爵別業在石岡門東李流芳婁堅有

詩

東園太常侯震陽闢在東城中有明月堂歲寒亭

金氏園都事金兆登闢在東清境境中有柳雲居

檀園舉人李流芳闢在南翔鎮

塾巾樓員外汪明際構爲流寓程嘉燧宋珏輩觴咏之

所在明德書院後

漪園諸生李宜之闢在南翔鎮

紺寒亭國朝進士趙俞構在東一都

鳳阿山房太學生侯開國讀書處在西城七畝朱魏尊

王敬銘有詩

西園金尚東所築中有十景其弟洪銓有詩紀之

寶山縣

譚氏園元朝散大夫譚有文別業在月浦鎮

沈氏園元忠翊校尉沈文輝園在大場鎮

嚴氏園處士嚴恭開在黃姚鎮

殷氏園明錄事殷清剛在七都

梅花村 國朝諸生浦翔春別業有玉映堂清夢軒諸勝

崇明縣

孝友先生隱居在姚劉沙元高士李重發別業其自詠有奉母甘蔬食呼童課古書句可以想其高致

南溪草堂明鄉飲賓張元敏所築有觀海樓乃吾廬讀

書堂白華亭東軒諸勝熊開元有詩紀之

祠墓

太倉州

名宦祠鄉賢祠忠義孝弟祠州縣合祀詳學校志

節孝祠在東門內州涇舖 國朝雍正元年奉 勅

建州縣合祀乾隆四年重建三十三年修

萊祠自以洋教主堂改基

地七分五厘十二年詳入公占初行人顧陳埭倡各後

裔捐置二十九畝一畝斜涇下澤圩田二十四畝助祠

公費知州江之煒撰祠田記乾隆三十九年後裔陸受

扶捐置二十九畝下四畝 圩田十畝縣境東一畝下

三畝 圩田二畝五十四年後裔王頤增置 祠右鄰屋十一間基地一分七厘未入公占

周孝子祠在穿山北孝子名容常熟人事母至孝宋乾

道中歿後降于家日兒爲神矣淳祐間進士趙必錦上

其事賜額顯惠明初命有司時祭邑人劉文立建其行祠于州地 國朝嘉慶二年戴繩武等重修

王文肅錫爵祠在雷應舖明萬歷三十八年勅建有司春秋祭祠地不入會計 國朝因之康熙五十八年

賜額曰懋勗貽範又

賜 國朝贈大學士前太常寺卿王時敏曰篤行通才
肅祀後寢祠內儀門右別建祠祀 國朝戶部侍郎王
原祁康熙五十七年撥款祭

賜額曰千秋名世

安道先生陳瑚祠在小北門外 國朝康熙中江蘇巡
撫湯斌廢五聖堂改建安道書院祀之

晉鵠子墓在直塘市重岡之原

張采引慶元志云直塘市有廣安寺後塘得古

家磚刻鵠先生字鵠子廣川人隱居不仕葬于東陵

武安寺重岡之原按武安爲廣安寺舊額曰重岡則至今有之慶元志固可正晉史之謬矣

宋司農寺丞郊宜墓在大北門內今木行橋西小巷內

兩旁石馬各一故墓道

朝散大夫郊升卿墓在樊涇北今夷爲民居神道柱石

猶存碣云三十朝散之墓

宋宗室墓二並在塗松北一里許傳稱南渡趙王墳

案

成志邑乘小識云二十年前塗松潘塘得一碑乃淳祐十年宗室保義郎趙伯旺之女二縣主爲其父立祠道院者有云考妣之墳坐于塗松市西先兄提幹附葬于先君墓側所云南渡趙王墳其是歟王疑旺之謬

元左丞朱清墓在北門外

虞萬戶墓在淮雲寺前

顧德墓在淮雲寺後趙孟頫誌

崑山學正王夢聲墓在二十二都號古川墓

文懿先生殷奎墓在大北門外鹽鐵塘之原

明兵部書陳洽墓在十六都

通判桑悅墓在涓涇之原卽其父珠墓旁

孝子陳元吉墓在陳洽墓北

惠齋先生周賢墓在鹽鐵塘東趙永言誌

贈尙書毛弼墓在東一都趙涇之原其孫澄誌

少保毛澄墓在城北鹽鐵塘東原賜葬

寧波知府周坤墓在雙鳳鎮之新涇

廣南知府周墨墓在鹽鐵塘東方鵬誌

工部司務周堃墓在河莊涇之原王世芳誌

新昌縣知縣曹祥墓在桃源涇

浙江叅議郝鼎墓在璜涇之原周錫誌

兵部尙書凌雲翼墓在二十九都東斗門圩

廣西副使凌必正墓在二十九都西斗門圩

孝子王在復墓在東一都

雲南副使曹達墓在鶴鹿涇西

漳州府知府周鐸墓在南上岡之原王基誌

浙江副使張振之墓在鹽鐵塘王世貞誌

太子太保王在晉墓在二十九都

僉都御史錢桓墓在吳川塘西

太僕寺卿陸獻明墓在二十九都

孝子呂雲孚墓在二十八都黃與堅誌

孝子呂雲奇墓在塗菰黃與堅誌

太僕寺少卿徐憲卿墓在二十七都吳偉業誌

安道先生陳瑚墓在五畝使字圩

國朝翰林院贊善黃與堅墓在二十九都

御史陸毅墓在沙溪北陳智涇之原子敦仁履謙祔

孝惠先生張閏墓在二十七都子大理府知府瞻洛祔

成都府知府王時翔墓在二十九都鄒庄涇圩沈起元

誌

行人顧陳塋墓在十五都琅玕涇之原

廬州府知府王宸墓在二十四都田家橋北

文學支元福墓在十二都一畝東結字圩

元福無嗣當
立勒碑墓側

天鎮縣知縣錢文梓墓在二十四都七畝田家橋北

贈榮祿大夫汪之恒墓在二十五都一畝沙溪鎮

工部侍郎汪廷璵墓在二十四都一畝九曲鎮

州同陸恬墓在十五都三畝戶字圩

鎮洋縣

陸宣公祠在九都六畝

王尙書世貞祠在小西門內明萬歷三十八年建有司
時祭入 國朝止嘉慶二年署江蘇布政使熊枚知州

鰲圖重修

白公祠在大西門外爲國朝知州白登明建

白高二公祠在茜涇爲知州白登明劉河營游擊高必

昌建

按白公開藩新劉河高公創議建闢且捍禦海口力保孤城民思其德故立祠報之

宋范仲淹衣冠墓在茜涇鎮景祐間仲淹爲郡守開茜涇浦親至海濱民感其德故沒後取衣冠葬此

宋墓在茜涇鎮南一里相傳高宗渡海有梅妃卒葬于

此今封邱隆起俗呼宋家墳

張采州志云按史高宗駐駕平江三日晚次吳江遂

幸臨安無渡海至崇明事而崇明志亦有蝦擁皇舟之說似皆誤

楊將軍墓在陸窰塘之原舊傳宋理宗時有楊將軍戰

死藁葬于此

元處士楊天定墓在陸窰塘曹睿誌

金鴻縣志云陸窰塘楊墓明張寅太

倉州志作楊將軍詳見周廣記考文徵明墓廟碑亦同

張采志則據吳升元語謂近有人發其誌乃元楊洪處

士墓因則楊將軍而載楊天定時代

久遠援據罕信今並存之傳疑也

朱節婦茅氏墓在大北門外壽山橋北至元五年殷奎

請于崑山知州揭傒斯得表

海道千戶宋榮墓在西一都

海道萬戶柴廷富墓在古塘南原

孝友先生秦玉墓在城西吳塘之原殷奎有改葬記

明孝烈墓葬孝子陸安烈婦鍾氏在四都

浙江參政陸容墓在小西門外陳門塘北吳寬誌子贈

大理事評事伸嗣

太常寺少卿陸欽墓在吳塘東原賜墓劉健誌

翰林院修撰張泰墓在北門外古塘之原陸欽誌

莆田縣丞王謹墓在二十都金字圩俗呼檀樹墳

兵部侍郎王倬墓在四都虞場涇左王鑒銘

右都御史王忬墓在四都楊林塘之原賜葬子刑部尙

書世貞太常寺少卿世懋祔

兵部侍郎王積墓在九都

翰林院編修國朝贈大學士王衡墓在二十都宋涇

陳繼儒誌

大理寺丞毛在墓在西一都會孫師柱祔

工部尙書張輔之墓在西一都顧錫疇誌

浙江右布政使顧燕詒墓在七都

江西按察使黃元會墓在九都致和塘姚希孟誌

兵部侍郎李繼貞墓在十二都楊林南原

翰林院庶吉士張溥墓婁江西館南岸黃道周誌

臨川縣知縣張采墓在東鄉

鄉飲大賓歲貢生張元敏墓在二都上七畝熊開元誌

文潛先生陸世儀墓在十八都

貞介先生盛敬墓在南門外

國朝贈大學士前太常寺卿王時敏墓在十九都欽蘭

誌

貞文先生王挺墓在二十都宋涇

贈戶部侍郎進士王揆墓在十九都六里橋

大學士王拔墓在二十都 賜葬惠士奇誌

戶部侍郎王原祁墓在五都 賜葬唐孫華誌

廣東巡撫王墓墓在十九都陳世倌誌

贈奉政大夫貢生沈受宏墓在西一都

光祿寺卿沈起元墓在十九都

贈光祿大夫畢禮墓在十九都壽庵西子贈光祿大夫

鑄孫例授奉直大夫瀧南邵南棠誌

國子司業張敘墓在吳塘東原

處士陳鉞墓在十七都正七首何字圩

安祿道人毛在鵬墓在二都三首雲圩祖塋之次程穆

衡誌

烈尼周氏墓在太倉衛署西乾隆八年巡撫陳大受書
血凝白壁字勒石表其墓

嘉定縣

名宦鄉賢祠詳學校志

忠義孝義祠在縣治前

節孝祠在九尚

二黃先生祠在東城新街 國朝康熙四十二年知縣

王樞詳建祀明進士黃淳耀文學黃淵耀

三忠祠在西城 國朝康熙六十一年知縣劉昆潛詳

建祀吏科給事中贈太常寺少卿侯震暘左通政使侯

峒曾副榜侯岐曾

時光祿祠在學宮西雍正二年知縣趙向奎詳建祀明

山西巡按贈光祿寺少卿時偕行

以上三祠並春秋上戊日記

唐上柱國都朝泰母姚夫人墓在十八都地名長墩

莊府君泰墓在東門外

宋郎中龔宗元墓在南峯

儀曹趙安國墓在登平橋西子揚州司理良弼祔

嘉定知縣高衍孫墓在東城裔孫郎中聰祔

監江浙都稅陸知微墓在一都十八崙

元醫學教授唐永卿墓在出字號景字圩

明中書張辰墓在西隱字西

訓導曾魯墓在趙涇

嘉定教諭李惠墓在西城八畝孫宗祐墓在旁

僉都御史徐瑄墓在西門外贈僉都御史宗安葬墓南
孫曄祔

刑部郎中潘暄墓在呂墅涇南子舉人潘京潘密祔
荏平縣知縣金洞墓在三都

四川副使范純墓在西門外護國寺後

御史徐博墓在項涇東

瑞州府知府李良墓在西城八畝

贈副都御史龔德華墓在蒲華塘壽山橋南

工部尚書龔宏墓在蒲華塘賜葬

大理寺正葛鏞鎮海衛指揮使葛鉞墓在河門塘鏞子
舉人廷遠祔

西安府同知宣景墓在宣墳浜

松陽縣知縣唐恩墓在南城

高邑縣知縣金洲墓在漳浦

贈營繕司主事張禎職方司主事張祥墓在安亭顧浦
東

蜀府長史龔有成墓在縣東北界涇

山東副使唐愛墓在婁塘鎮北

封大理評事邱鉞墓在方泰

大理寺正邱峻墓在方泰

山東副使張意墓在安亭浦家巷

舉人趙中行墓在十二都

職方司主事張楫墓在槎浦南黃涇

撫州訓導唐欽堯墓在西城何家浜

副都御史沈人种墓在西門外

贈安吉州知州李文邦墓在第二塘

登州府同知李汝節墓在十二都子先芳姪名芳流芳

祔

德清縣訓導金禹民墓在斜涇

白水縣知縣莊璣墓在明德書院東

贈按察僉事侯廷用墓在十四都五世孫泐六世孫開

國祔

廣西布政使龔錫爵墓在二十三都

江西參政張恆墓在十三都

職方司郎中殷都墓在項涇西

贈定海縣知縣時恩墓在華亭涇口

刑部侍郎歸子顧墓在西門外徐塘橋西賜葬

生員張應武墓在一都

潮陽縣知縣陳國紀墓在東門外

刑部郎中周道隆墓在始字號

布衣唐時升墓在南門外

貢士婁堅墓在南門外石岡門橋南

僉都御史孫元化墓在羅涇

遠安縣知縣汪允貞墓在四都

工部員外郎汪明際墓在皇慶寺西

刑部郎中徐元嘏墓在項涇贈尙書徐經徐頰墓西

進士黃淳耀墓在龍字號二十四畝劍字圩弟淵耀附

按淳耀父子兄弟共有四穴墓地二畝係田六畝役子孫家貧售干他姓墓日就圯乾隆五十四年邑紳士金以塋等捐貲贖歸旁田二畝經縣令於一方給示禁止樵採侵佔者附誌于此

職方司員外郎周之謨墓在顧蔡灣

義僕李崧墓在斜涇

國朝嘉定縣典史閔有義墓在貞際菴西

嘉定縣縣丞殷相墓在皇慶寺東

徵士陸元輔墓在徐家行東北

定陶縣知縣趙俞墓在一都

侍讀學士孫致彌墓在羅涇

唐縣知縣王恪墓在六都楊涇之原

翰林院修撰王敬銘墓在六都楊涇之原

溫州府知府金洪銓墓在朱涇東奈號子鳳綸祔

詹事張鵬翀墓在南門外葛家橋

贈奉政大夫錢王炯墓在西十七都天宇圩子贈中憲

大夫桂發祔

崑山徵士朱厚章墓在南門外

鈍閒詩老張錫爵墓在復禮鄉火字圩

邑人沈煉培封古墓記畧

嘉靖乙未雲崑李公視篆之

然有思古之懷遍詢諸父老考求境中古墓乃封之樹
之祭享之于是于宋墓得其八于元墓得其二于國朝
墓得其十焉若當塗令孫岳通議大夫孫偁墓則得之
合浦門外護國寺後偁爲載之父邑志皆悞以爲載墓
載之孫秦州司法墓則得之邑治集仙宮西閭門寄班
祗候洪公墓則得之朝京門西北守信鄉濠州定遠尉
承德郎趙應龍墓則得之縣東北二十里蕭涇之原錄
判冀天定墓則得之呂聖涇陽護國忠惠侯楊滋墓則
得之縣西十里外岡鎮西南朝奉大夫譚公友文墓則
得之晏海門外三十六里月浦塘之北是皆宋墓也文
學瞿梅岩先生懋墓今在朝京門外百步外蘇將軍良
墓今在儒學左畔橫涇之東是則元墓也袁司訓銘墓
于社稷壇右楊涇之原得之黃太守采墓于邑治西廣
儲庫右得之錢太守鉉墓則于斜涇之陰得之陸司訓
墓則于練祁塘北得之顧同知海墓則得于城隍廟後
彭參政育墓則得于邑治南張馬街之墟薛醫士墓邵
知縣翼墓皆得于朝京門外劍字圩儒士金聲墓則得
于邑治清鏡塘之原章居士龔墓則得于走馬塘南孫
家浜之南是皆國朝墓也嗚呼上下四百年間諸墓之
在茲土者湮沒于荒沙蔓草供牛羊之踐履爲熊牧之

躡躡者何可勝恨今得李侯爲之增修培築表其名姓
是蓋令名考德固羣公之懋昭而封墓澤骨則李侯之
仁政也鄉民楊品董治斯事具述其詳于予故爲之記
○按記畧內諸墓今不重載于前惟譚友文章翻二墓
今隸寶邑故
仍列于後

寶山縣

名宦鄉賢祠忠義孝弟祠詳學校志

節孝祠在

二黃先生祠在楊行鎮 國朝乾隆十五年知縣田聯

芳建二十年知縣李元奮詳請撥款專祭

案寶山係嘉定分治黃氏

後裔現居寶邑故並立祠

宋桂林宣撫使朱存仁墓在十一都

元朝奉大夫判太史局譚友文墓在月浦塘北

霍邱尉沈龍躍墓在大場鎮北子武畧將軍雷奮忠廟
校尉文輝附

懷遠大將軍張武墓在大場鎮保華寺北

明處士章黼墓在十都孫家浜

孝子沈輔墓在八都戴家浜

承事郎殷維墓在衣號二亩子清孫甫附

兵部侍郎張任墓在廣福鎮東南賜葬

廣信府知府沈陽墓在八都青浦場

封員外郎孫繼統墓在八都黃潼港北

岳州府知府戴光裕墓在六都

封知縣嚴鑑墓在嚴家角子刑部員外郎嚴貞度附

福建叅政侯堯封墓在虬江子孔詔孫震暘曾孫峒曾岐曾祔東祔元孫洵演潔濤及婦夏氏姚氏龔氏盛氏生員嚴衍墓在十都

嚴州府同知唐仲賢墓在屈號五岳

正千戶車宗墓在西門外

正千戶車舟墓在車宗墓南

昭勇將軍趙澍墓在暑號十五岳

進士王泰際墓在六都藏字圩子揖汝翊梓祔

翰林院庶吉士王晦墓在六都調字圩

監察御史鄭際川墓在小練祁南

德化縣知縣錢春沂墓在錢家樓南

中書須大進墓在重號一畝

國朝武進士徐憲文墓在岡號四十三畝

封中憲大夫李實墓在元號十五畝

封文林郎印輯瑞墓在衣號三十六畝

南康縣知縣申毓來墓在元號十七畝

教諭施麟瑞墓在洪字號

崇明縣

名宦鄉賢祠忠義孝弟祠詳學校志

節孝祠在城東街 國朝雍正三年知縣將天主堂改

建

有子祠在吳家沙盤龍鎮 國朝乾隆四年裔孫瑞建

樊子祠舊在箔沙海蓄圯廢 國朝順治七年裔孫昌

德捐宅改建于東門外

范文正公祠在西門內署縣會曰珏重修

孝友先生祠爲秦玉建名勝志云在舊州學內

劉公生祠爲明知州劉秩建

愍忠祠爲明知縣唐一岑立

遺惠祠爲明巡撫周忱巡按周如斗知縣孫裔典建

陳公祠爲明知縣陳文建

何公祠爲明知縣何懋官建

按已上四祠俱在平沙洋城遷祠廢惟唐公神位移

祀今費慶寺

盧公祠爲明知縣盧復元建俗呼盧官人廟

熊公祠在察院西爲明知縣熊開元建

王公祠在堡城武廟前爲明知縣王宮臻建

李公祠在察院西爲明知縣李招鳳建

陳公祠在西門外爲明守備陳安國建

按已上諸祠今俱廢

劉公祠爲國朝提督劉兆騏建

梁敏莊公祠爲總鎮梁化鳳建

張公祠在金鰲山爲總鎮張大治建並祀知縣王恭先

穆清恪公祠在西門內爲總鎮穆廷栻建

朱公祠在西門內爲知縣朱衣點建今廢

解公祠在西門內爲知縣解銘建今廢

楊家墓秦家墓俱見舊志今沒于海

左都御史顧達墓在長沙

四川僉事施一德墓在平洋沙

知縣贈光祿丞唐一岑墓原葬平洋沙西 國朝雍正九年樊壘改葬于蟠龍鎮之東阜

訓導張文澄墓在儒學前東南文澄家陷于遼不能歸買地築別墅屬其學弟子身後葬此改墅爲祠祀像其中年久爲僧所佔墓北亦爲潮水所蓄生員祝大中等用木版障之今復圯

光祿寺少卿沈廷揚墓在堡鎮

國朝監察御史袁飫墓在三長沙胡寶琮誌

沈文鎬墓在

柏謙祖父墓

柏謙墓

名蹟

太倉州

土山在雙鳳鎮又名鳳岡名勝志云晉瞿硎先生修道處張采志作舊志云相傳元周道養煉丹于此

墨妙亭在淮雲寺相傳寺基卽顧信故宅信從趙孟頫遊得書卽募諸石構亭貯之顏曰墨妙後廢石刻二一

書歸去來辭一書送李愿歸盤谷序今移嵌學宮壁間

按蘇州府志墨妙亭在顧信西園明嘉靖中湯墩陶氏掘土得石函內藏趙書

鐵釜舊在北門外造船廠後今移置海寧寺相傳通番

葦葦者徑六尺三寸五分高四尺三寸五分口圍二

十尺二分腹圍十七尺邊濶九寸九分厚二寸四分

西門城堙明蘇州府同知任環因疾處

按江南紀畧嘉靖三十二年任

環擊倭賊積勞疽發于背猶裹創履陣後乃歸
太倉西門城堙郡中士民呈于各院檄而歸之

崑山高六尺許嘉靖間鳳里周氏物傳爲元時所購吳

暇有詩紀之

落星石在鳳岡後不詳時代

羅漢松在鳳里七岡大可兩人圍之爲鳳里十二景之

一

鎮洋縣

黃姑村去張涇關東南三里相傳牽牛織女二星降其

地織女以金篦劃河水牽牛不得渡土人因立祠俗呼織女廟廟西有水名百沸河黃姑者猶桑落反語爲索郎

烏夜村名勝志云晉穆帝何后父淮居此產后之夕有羣烏夜驚于此自後凡遇烏鳴徹夜必有赦至村舊屬崑山縣今割入州明高啟有詩

茜涇古塔高四丈圍如之相傳魯般一夜累甃成之南里許有池水中見有塔影爲茜涇十景之一或云尙有雙井環洞橋皆仙一夕所造有物色之者仙遽去故橋井不及樹欄塔不及蓋頂今井廢止存橋塔

甘井在南門內甘泉巷相傳三國時甘寧故宅

按程善衡武氏

宗譜序云武氏舊居甘泉巷乃百戶甘旺故宅旺原籍定遠以從攻采石克太平又征東川烏撒功得世襲是甘寧乃甘旺之誤

唐褚遂良書太宗哀冊石刻舊藏明吳江史鑑家吳寬有跋王世貞購歸嵌山園今置樊村涇吳氏宗祠

宋米芾書墨池二大字石刻弇山園故物今畢氏移置南園壁間

蘇軾小楷書歸去來辭石刻舊在洞庭分秀山房今歸張氏

斷碑聖像元至正乙酉朝貴命置碑石赴都抵直沽石忽斷中有聖像莊嚴惟肖劉文明文政載歸朱應發請于嶽祠安奉

金鶴縣志云元時嶽祠有三此嶽祠未知何所

銅鐘元延祐四年知州王安貞鑄舊懸海寧寺明正德元年知州翟敬遷報本寺萬歷五年兵備道王叔杲開朝陽水門架樓關右移置于此鐘徑五尺有奇圍三丈晨昏二鳴聲聞十里外

元劉鸞塑觀音像在古興福寺鸞善塑稱妙品明宏治間燬舊石明王世貞築弁山園時有從廢園下得石刻曰芙蓉渚是開元古諫或云范石湖家物世貞環山堂溪上種紅白芙蓉樹石溪右約高五尺廣二尺

繡雪堂壁間有董其昌書話雨二字左方書丁卯同陳眉公訪遜之山館聽雨題四月七日其昌二十字墨南渡桃花州城西南俯婁江居民家各穿池池上種桃

花時泛舟江上最爲勝遊後斬又畧盡而城中太倉衛
前植桃轉盛今亦所餘無幾矣

天妃宮西域海棠明永樂中太監鄭和攜歸植

黃姑塘大梅樹相傳數百年物今樹枯其地猶呼大梅
樹頭

鶴市大桂相傳元時高三十餘尺周四十七步有奇枝
葉匝地 國朝康熙時猶留一旁幹大可合抱今無存
朝陽門內大桂一株畧與鶴市桂相埒係明時李侍郎
繼貞手植

南圍古梅名瘦鶴明太傅王錫爵手植今屬繡雪僧舍
王育豫

一香雪藏在西一都

吳塘之原

嘉定縣

鐘樓在東南城上明萬歷十八年知縣熊密建 國朝
康熙四十三年知縣王樞重建邑人趙俞有記雍正八
年知縣江之煒修

徐公坊在城西宋開禧中徐亮釀酒處明嘉靖間其裔
孫構宅居之

瑞竹軒元時集仙宮道士孫應元嘗于齋前植枯竹架
薔薇忽生枝葉逾年叢起遂成林因以名軒

仙人迹在馬陸村北有池如足形遇旱潦水不盈涸
南翔寺尊勝陀羅尼經石幢二在大殿前東西相對一

立于唐咸通八年一立于乾符二年

八角井在南翔寺九品觀後園周遭皆刻字大小不等
宋慶元庚申歲沙埭里人龔大雅鑿井題記

楊涇在縣治東南一十八里元時有孝女楊九娘奉父
母守桔槔蚊蠅不易其處以羸死土人立祠祀之因名
其地曰孝女里涇曰楊涇又涇有泉眼名菊花泉相傳
飲之益壽

周公村安亭北三里本名杭家村明巡撫周忱徵行至
此飯于民家見其耕耘紡織具曰是家當世世豐衣食
後人因名其地爲周公村

婁塘古松在鎮北野田中大可十圍枝橫數畝相傳宋

時物

寶山縣

旗椿石在江灣相傳宋建炎四年韓世忠架大纛置高丈餘體極堅壯

鐵櫃木船明嘉靖初南橋鎮沈東津于宅後掘得

綠泉在城南又名六泉曰其穴有六也今没于海

菊花泉在劉家行白蕩中張錫爵有記

大銀杏在真如鎮南陳公里社司祠前高數丈圍四丈餘相傳宋時物又月浦鎮東陳家店有古杏一株高大與真如等亦宋時植

真如老桂在侯氏宅高數丈大數圍蔭可五畝花時香

聞十里相傳元時植侯開國有詩

雙桂在大塲顏氏後圖幹合枝連花尤香郁傳是元時植

古梧桐在七浦缺口陳氏墓大兩抱高十丈相傳元時植海舶百里外望此爲識收泊楊家嘴

崇明縣

蝦港在東三沙相傳宋高宗至崇泊船此港午潮退後遽命放舟時上微服舟人不知曰秀才官人不曉事無潮安得行忽有二巨蝦擁水浮舟出海故名

鍾家宏明監軍唐順之駐此禦倭訓練水師

曾姚港鎮撫包榮勦倭殉節處

水竇港明知縣唐一岑與倭血戰于此

鱗魚港倭變時此港出魚抹饑故名

東林淨水唐貞元間僧道成鑿味甘美清冽元至正間州同知張翮品之以爲不下惠泉

拗拷雙鐘元至正中二鐘隨潮至相擊作聲停東沙岸旁弗去一置壽安寺一置慈濟寺晨昏叩之聲俱拗拷鼓樓港在三沙城明宣德中知縣王瑛連俊相繼建鼓樓十座時城對狼山每晚潮漲則第一樓擊鼓以次傳至第十樓城中始鳴鐘定更

鐘樓元至正中建聲聞海門通州知州伯顏有詩又朝陽門鐘樓明萬厯中建聲聞三十里今傾廢

鶴塚在東沙

蟠榆在平安鎮西里許幹逾兩圍枝皆鞦韆下垂且多連理高不過二丈而葉蔭半畝

寺觀

神宇附

太倉州

聖像教寺在六河市僧仲殊記云三國吳僕射徐真捨宅晉建興二年得泛海二石佛因名宋嘉祐八年朱肱更造明洪武初重修歸併院一曰崇壽菴七曰福田崇福並河歸雲資福東禪時思

張采志云按晉以前聖像未來時寺當何名及考吳

無僕射僧記爲荒矣

法輪教寺在雙鳳鎮晉支遁建咸和六年賜額至元憲

宗時陞福地歸併寺一曰霽寶菴四曰法華迎春二在
常熟明萬歷年重修

廣安教寺在直塘市唐乾元初簡師建初名寶林寺宋
祥符元年改今額紹興六年僧了悟建塔鑿地得甌有
長安三年瞿像寶塔字乃知唐武后時嘗建塔于此明
永樂四年僧拱辰重立歸併寺一院一菴一俱在常熟
海寧禪寺在武陵橋西宋建炎四年里人郊承直捨地
僧善能建庵曰妙蓮紹興二年改名廣法教院元大德
間朱清督海運奏改今額延祐二年重修趙孟頫撰碑
記明洪武十一年靖海侯吳禎萬歷二十四年王世貞
世懋國朝乾隆二年畢禮俱重修後圯三十三年陸

恬重健歸併菴二曰止宗

覺

按趙孟頫記云海寧禪寺梁天監中尼妙蓮故

址也尼以矢節得度茶毘日烟中皆現蓮狀鄉人因以題庵建炎間地屬邨承直復施僧設廬則妙蓮庵之創乃始于梁非始于宋也

淮雲教寺在城北二里元大德二年顧信建信葬父德建寺墓前以先籍淮安故名永樂初平江伯陳瑄重修歸併庵七日能仁慶福集福五涇太平顯福慶福宣德五年重修彭春撰記、國朝吳偉業有寺址蠲糧碑記乾隆六十年知州鰲圖書皆大歡喜四字於大殿靈寶長壽寺在沙頭鎮元至元壬辰僧雲峯建明嘉靖間火古林老募重建陸之裘撰記

萬壽寺能仁寺俱在甘草鎮宋崇寧五年建

文昌宮在學宮左

祐聖道院俗名北道觀在大北門內

延真道院延禧萬壽觀俱在沙頭鎮

靈真道院在直塘市

玉芝祠在雙風鎮舊名普福宮元大德間道士周靜清
建至大中仙官祠產芝一本四十二莖改今名明崇禎
年玉皇閣圯廢僧大通復建開左增立瑞芝禪院

李王廟在大西門內明嘉靖十年知州陳璜建後圯

國朝乾隆四十九年里民重修別有廟在西一都二畝

攷郡志神名錄云長興童莊人宋潘王變
謀屠城神見夢于理宗城獲全吳人祀之

張英濟王廟俗呼賢聖堂在大北門外別有廟在太平

港

周神廟在海寧寺左別有廟在穿山北

總管堂在州治東元薛道純建俗呼薛家總管堂乾隆四十年里民張懋中募修別有廟在大南門外
興德土地廟在海寧寺左俗稱西土地廟

鎮洋縣

隆福教寺舊在武陵橋北梁天監四年建名報恩院唐天祐間重建宋大中祥符元年改今額元末張士誠燬像改市舶司明洪武十三年復改鎮海衛十四年衛人孫徹復捨宅建寺于小西門內長春橋北崇禎十一年僧應初重修 國朝乾隆七年大殿火二十四年後開

又火里人捐募修葺寺前放生池大可二十餘畝植荷花甚盛

報本禪寺在海門第一橋北元大德庚子海道千戶宋祐建後燬明洪武十五年僧谷清重建歸併院一日興福

菴鐘禪院在朝陽門水關內明萬歷五年兵備道王叔

果建俗名鐘樓後燬國朝康熙十二年重修黃與堅

撰記乾隆二十九年重修加層樓爲六較舊高二丈許

今漸圯嘉慶六年知州康基田改

文帝廟

詳營集
聖廟

獅子林在鐘樓左國朝康熙十七年僧德樹建今圯

潮音庵在城南隅元至正己卯建初名闡明萬歷丁未

蜀僧三際改爲庵王錫爵題額李繼貞有記

海印庵在朝陽門內故鎮海衛中所地明萬歷年間僧
恆如建初名印月庵崇禎初王時敏增建殿宇易今名
董其昌題額李繼貞有記

準提庵在海印庵西明萬歷間僧 建

福城庵在城西南隅舊名長壽庵 國朝吳偉業增修
普濟教寺在南門外一里元朱清建張士誠據吳焚蕩
明洪武辛酉癸亥年間重建永樂戊子增修萬歷元年
殿火僅存齋室歸併院一曰崇福庵二曰崇福曰松林
南廣教寺在大南門外十里地名陳陸祈宋紹興三年
朝奉大夫杜革建以祀其祖司徒衍元至正間僧惟一

重修賜額南廣壽院明洪武中定爲教寺歸併寺一在
嘉定後廢國朝順治十四年僧石奇重建并置田飯
僧後漸增益里人唐孫華顧陳埏俱有飯僧田碑記
香林寺在大北門外國朝順治初太倉衛千戶王月
樓捨田三十畝僧永修建僧聞行復增建名曰香雲寺
十七年聞行至京師隆安寺值

世祖章皇帝臨幸得見問此僧住何處住持僧以太倉
香雲寺奏

上諭香雲不若香林好康熙十二年蘇州府知府寧雲
鵬奉禮部劄製香林寺匾額給寺

興福寺在大西門外元至正戊子建後廢爲水次倉明

光宗在東宮時賜復舊額重建于舊址西南里人陸文獻有飯僧田碑記

廣孝教寺在茜涇鎮唐咸通十四年建初名懷讓宋淳化元年僧志瓊道清重修大中祥符三年改賜今額元末燬明洪武二十三年里人陶福鼎暨僧智積重建相傳姚孝廣爲住持歸併庵一日正受

崇恩禪寺在城東二十里梁天監四年僧道悟建唐開成二年宋慶元二年凡再修造元末燬明洪武二十四年僧元焙復建今圯

三官閣在鎮民橋西南元至順庚午道士錢日升建後廢明永樂四年里人徐道名重建後改二卿祠嘉靖間

二卿移祀長春里文昌祠仍爲三官閣

靈隱道院在城南隅俗呼南道院元大德三年里人王都運建內有死事指揮馬子龍像今圯

曇陽觀里人爲王錫爵女壽貞建在城西南隅壁間有尤求白日升天圖後觀廢惟太僕寺卿徐燝翰林修撰沈懋學二聯猶存 國朝嘉慶二年知州鰲圖邑紳汪學金移建于隆福寺西尙書朱珪題聯額學士劉鳳誥作記主事汪彥博書

織女廟在黃姑村卽牛女二星降處宋咸淳五年建嘉定知縣朱象祖修治舊列二像建炎中有浙客題詩云商賤初至月埋輪烏鵲橋邊綽約身自道佳期唯一夕

因何朝暮對斯人鄉人遂去牽牛獨祠織女

晏公堂在朝陽門內之西晏公不傳名氏元時護漕封平浪侯漕運官軍立祠祈賽別有廟在長春里

水仙廟在大西門外

金龍四大王廟在水仙廟西漕運官軍祀之乾隆六十年鎮海軍更建廟長春橋之西二衛遂分祀

寧濟侯廟在隆福寺東康熙初里人卽寺東殿改建

楊將軍廟在新塘市東周廣記云將軍宋人理宗時力戰死藁葬陸窰塘之原後墓屢見光怪里人立廟祀之
禱輒應明成化十二年僧卧雲重修

夏穆二將軍廟在茜涇東南俗呼夏廟址

大微道院在大西門外 國朝康熙元年道士張翔建
二十七年修黃與堅撰碑記

福德土地廟在南門內相傳明諸生沈承故宅並云神
卽承也

〔嘉定縣〕

資善寺在東城初名資福元至大四年建明萬歷三十
年僧道林重建改今名

法華塔院在縣治前登龍橋南舊名金沙塔宋開禧年
建元至大年僧道堅修明萬歷年知縣陳一元重建

國朝康熙雍正乾隆三次修理張錫爵有重修法華塔
記

積善寺舊在北門外明洪武十一年邑人林仲實重建于東城萬厯四十四年沈潮復改建

圓通寺在東城元至元二十三年僧明了建大德三年賜額皇慶元年燬延祐間重建

昭慶寺在北城明萬厯三十三年里人唐忠施地僧海珍建庵崇禎九年趙洪範改建寺

西隱寺在西城元泰定元年僧悅可建中有寂照堂直節堂壽樂亭空翠亭勁節軒羅漢雙松明徐學謨張任皆讀書于此學謨後與任子其廉增勑竺竹院藏經閣

崑福講寺名勝志云原在江灣明初移建縣治之西舊

霧順吉祥院也

按縣治云崑福寺舊在月浦鎮梁天監間建久廢明洪武初改爲顯運巡檢司

署移寺于縣
治西今亦廢

真際庵在南城元泰定三年僧良王建明萬厯三十九年重建國朝侯湘有真際庵閔陳孟陽真跡詩

西林庵在縣城西南隅舊名祝聖庵明崇禎二年重建董其昌書額黃陶庵先生兄弟殉節處後人名之曰留碧軒國朝張鵬翀書張錫爵有重建西林庵留碧軒記

留光寺舊在南門內宋天聖間里人吳珍施地瓶菴乾道初僧德謙建寺淳熙間移仁和縣留光顯慶寺故額名之明正德初遷南門外嘉靖間燬于倭萬厯間僧宏化重建國朝康熙九年地震燬傾

雲翔寺名勝志云在縣南二十四里梁天監間里人掘

地得石徑丈常有二鶴飛集其上

人名之曰鶴跡石

僧曰得齊

者卽其地作精舍每鶴至必有檀施後鶴去不返一夕

忽有題詩于石上云白鶴南翔去不歸惟留空跡在名

基遂名寺曰南翔或云唐文宗開成四年行齊止錫見

雙鶴翔集若有所依因駐錫于此增修寺宇一日笑曰

吾事畢矣鶴如之何乃翔翔南去

按此是南翔寺名非始于梁卽始于唐縣

志謂宋紹聖間賜寺額者似失考

元至元間僧良珣重建明正統間巡

撫周忱萬歷初歛人任良佑先後重修

國朝康熙二

十九年御書雲翔寺額賜之改今名

大德萬壽寺在南翔元大德初僧良珣建明嘉靖三十

一年僧可貝修 國朝順治七年僧超界再修舊有塔
久廢

萬安寺在南翔鎮新華浦元泰定間僧義榮建

集慶寺在南門外三里元至正四年僧妙智建明洪武
三年僧覺軒修

皇慶寺在北門外三里元至大四年僧明了建

何庄寺名勝志云在婁塘鎮北今日永壽寺有何氏唐

宋以來家焉延呂蒙正爲塾師于此何自建寺設其先

龕位于內名曰香火院

按縣志云何氏建庵俗稱何庄寺元祐間呂師說重建名頓悟

院明洪武
改爲寺

褒忠寺在蕭涇宋乾道間建慶元六年趙郡王奏移廢

寺額爲名明永樂十二年僧景岑重建

護國寺在西門外梁天監間建宋天禧間賜額明嘉靖四十三年僧德真萬歷間僧圓讚明瑜等皆常建諸殿閣國朝康熙間重建天王殿觀音閣

普濟庵在西門外國朝康熙初僧正性行僧超選募建接衆嘉慶二年重修錢大昭撰碑記

方泰寺在方泰鎮梁天監二年建唐大中三年賜額吳越錢氏重建

菩提寺在安亭鎮梁天監二年卽孫吳時廢寺址改建後唐清泰時改名唐興宋開寶間賜今額明萬歷二十年僧海月重建

羅漢寺在黃渡鎮宋建炎間僧法裕剏乾道間賜額元
元統初僧定能重建舊佛座石皆紫端可琢爲硯後爲
里人易以他石

萬壽報恩寺 國朝乾隆四十六年邑人陳熾芎建造
于婁塘鎮

吳興寺在外岡鎮梁天監十年建後漢乾祐二年僧用
通重建中有唐碑已漫滅

集仙宮在東城宋嘉定十七年道士葉子琬建請安吉
縣勅賜額爲名紹定元年知縣陳邁道士盧真祐元大
德十年道士孫應元屢有興建明正統間勅賜道經一
藏嘉靖二十九年萬歷三十二年先後復修建宮四周

環水名玉帶河

崇真道院在黃渡鎮宋紹興中歐董二法師建元大德五年道士秦真祐重建

南道觀在二十二都元至正六年建

三教堂在縣治後元至順二年僧善學建明永樂間道士潘道鉉正德間道士朱粹然增修內有古銀杏一株伏虎土地祠在縣治前宋嘉定十一年知縣高衍孫建蕭澤土地祠在登瀛橋南舊名土穀祠明嘉靖間知縣李資坤建今改爲東隅土地祠其西隅土地祠在濮家巷東南隅土地祠在城中一畝怡雲土地祠在二十三都采仙土地祠在西門外南聖土地祠在東一都趙浦

土地祠在趙浦元至正九年建北聖土地祠在皇慶寺東

滬瀆龍王廟在黃渡鎮元大德中都水監李果建明天順間知縣龍晉修

晏公廟在黃渡鎮明洪武間建

楊忠惠侯廟在外岡鎮明洪武二十九年里人楊子明建

孝女楊九娘廟在楊涇明洪武三年里人王子善建

按名勝志云白鶴村有叔梁紇廟相傳已久或孔氏子孫僑居江南所建然祠廟記嘉定有紀王廟祀紀信大梁王廟祀彭越樊將軍廟祀樊噲陳侯廟祀陳平曹王廟祀曹植秦王廟祀秦叔寶杜拾遺廟祀杜甫則又皆不知所本云故縣治雖載今皆不采

寶山縣

保安禪寺名勝志云在沙浦梁天監中恒知禪師遊此
間廬葦中有猛獸因跌坐經旬村叟來饋食見二虎馴
狎左右善信龔延諤乃建庵以居之宋嘉定間改爲寺
明萬歷四十七年僧廣潮重建

真如寺舊在官場宋嘉定間僧永安建院元延祐間僧
妙心移建桃樹浦請額改爲寺明宏治間僧法雷重建
淨信寺在月浦鎮宋寶慶間里人譚思通建移錢塘舊
寺勅額爲名寺有佛耳泉以鑿井得木佛耳故名元僧
普現常增修後廢國朝僧鑑明復其額添覆佛樓

保林教寺在江灣鎮名勝志云五代晉天福年龍樹法

師駐錫于此亦梁時叔始也宋徐冲有鐘樓記嘉定志云後周廣順二年賜額明永樂六年里人李雪庭重建崇福寺一名天樂在江灣鎮宋開寶八年建

興聖寺在月浦鎮宋紹興元年建十八年賜額明永樂二年里人吳道堅重修嘉靖十五年燬于倭國朝康熙間寺僧善聞乾隆八年僧栖雲先後修葺

法昌寺在八都青浦舊鎮宋淳熙十六年鹽場官黃紳僧彥開同建錢塘廢寺有蘇軾書額移而榜之明嘉靖三十四年燬于倭萬歷四十三年里人黃體堯重建法界寺在大陽鎮宋嘉定間建元至正間改寺明止統間僧圓解重建

保清寺在法界寺北宋淳祐三年建明永樂二年重建
永壽寺舊在大場鎮錢家浜宋淳祐間里人徐耆建成
淳間賜額元元祐二年僧良珦移建十一都葑村塘
寶華寺在大場鎮宋咸淳間僧淨光建

東林寺舊在嘉定縣東門外宋紹定二年僧有謙建明
洪武間僧時習移建六都之楊涇今隸寶邑

頓悟寺在盧涇元元貞初僧師範建院明洪武間改爲
寺

普慧寺在廣福鎮元天歷初僧善學剏明萬歷間僧純
一重建今圯

崇福道院在月浦鎮元至元間建明永樂間賜額 國

朝康熙朱元亨重修今廢

景德觀在江灣鎮卽東嶽行宮宋靖康二年建

湄浦土地廟在六都

小場土地廟在小場浦

鵝籠土地祠在七都

〔崇明縣〕

奉聖寺名勝志云在東沙唐貞元間僧道成建

慈濟寺宋淳祐二年建圯于海城遷長沙復建于朝陽

門 國朝順治中重修內有大雄寶殿額趙孟頫書舊

作兩行後改橫列今廢

壽安寺宋淳祐間建舊名富安後改今名圯于海明萬

歷間知縣何懋官撥民田令僧道元重建于今東門外
馮夢禎爲撰碑記 國朝康熙七年有大士像浮海而
來總領張大治神之與知縣王恭先市地一頃有奇收
建復築金鰲山鑿玉蓮池植紫竹林于其後乾隆四十
年知縣范國泰增修有清蓮堂豐樂亭月圓諸勝

興教寺創于唐之興元年間明萬歷中徙建于南沙王
衡撰碑記 國朝順治十年復改建于新開河之西乾
隆十二年重修

普濟庵明特庵前爲中津濟渡處泅水者輒淹斃因爲
屬鄉飲大賓張元敏築橋以通其行建庵以鎮其祟知
縣熊開元有碑記

貞風庵在城西南隅貞女劉氏居此故名

西禪堂在城濠西北舊名本然廟中貯藏經

三清殿在城東北隅舊名寶慶觀宋淳祐二年建有文

天祥書海上瀛洲額無存

崇真道院舊在西沙以海警遷城東十六里盤龍鎮

文昌宮在東關外演武場者久廢一在新開河一在吳

家沙蟠龍鎮 國朝雍正十三年邑人茅大成募建

馬王廟在西門內

土地堂在洪敷沙

周神廟俗名貍廟一在北門外一在東阜沙按通州

志云宋時有猛獸名貍掠食小兒人莫能制有農夫

周姓者伺其出持勦擊之與俱斃里中立廟祀焉後高宗南渡值昏夜廟出火爲導因勅賜封王廟號錫允

石郎廟名勝志云在縣東南十四里宋末風潮中有石

人長二尺許浮至東鄉廣慶橋下去而復來人異之立

于橋側祈禱輒應元至元間達魯花赤道赤立廟祀之

後遷葛家橋

按縣志古蹟門載石大郎廟在舊州城東十四里相傳宋元間人少孤爲牧豎一日

遙見波心有光來近視之乃果寶羣牧赴水爭取爲郎

先得食之卽死浮屍經旬不腐所遇上隨張信宿問

積阜掩屍衆異之創草庵廣慶橋畔設像祀之至元中

達魯花赤某易廟以瓦時上海縣湖塘別墅間郎像露

異遂藏玉廟亦隨淪于海明嘉靖間千戶王應麟爲南

淮把總始知郎像在焉欲取以歸土人設一像混之真

贗莫辨王偶攜其一附祀天妃宮屢著靈異後上海人

來云向所取適得真者自是彼中之像無驗矣此事與

名勝志所記時地俱同但一爲石人一

爲石姓耳未知孰是附誌之以廣異聞

生員屠奉誥同校

屠逢泰

直隸太倉州志卷五十一終